

Forza idraulica en il center da la politica d'energia

Rapport davart la politica d'electricitad dal chantun Grischun

■ (cc) La regenza ha laschè elavurar in rapport davart la politica d'electricitad dal chantun Grischun e deliberà quel per mauns dal cussegl grond. Quest rapport mussa che la politica vertenta en il sector da l'electricitad è sa cumprovada da princip. Sin basa da quai è vegnidas actualisadas e formuladas da nov las finamiras da la politica d'energia che tegnan quint dals conturns ch'èn sa midads. En il rapport davart la politica d'electricitad dal chantun Grischun vegnan mussads las midadas ch'igl ha dà sco er ils potenzials e las pussaivladads d'agir en il sector da l'electricitad. Sin basa da quai è vegnidas actualisadas e formuladas da nov las finamiras da la politica d'energia. Quest rapport mussa però er che la politica vertenta en il sector da l'electricitad è sa cumprovada da princip.

La finamira dal rapport è quella da furnir al cussegl grond ina vasta basa da discussiun per definir la politica d'electricitad futura. La preschentaziun duai però er gidar a furmar en moda pli vasta la conscienza concernent quest sector ch'è impurtant per l'economia publica dal Grischun e furnir ina basa per rinforzar il Grischun en il sector da l'electricitad.

Forza idraulica sco punct central da la politica d'electricitad dal Grischun

La forza idraulica che ha – tant or dal punct da vista quantitativ sco er or dal

punct da vista da l'economia publica – ina impurtanza enorma per la produziun d'electricitad en il Grischun vegn tractada pli detagliadamain en il rapport. Las finamiras da la regenza prevenan da rinforzar anc pli fitg questa impurtanza. Uschia duai la produziun d'electricitad da las ovras idraulicas grondas vegnir augmentada per 860 GWh per onn ed il chantun duai – cur ch'el dat concessiuns e coordinescha quai cun las vischnancas – far valair sche pussaivel ses dretg da participaziun.

Las participaziuns dal chantun a la Repower SA ed a la Grischelectra SA duain – tenor l'opiniun da la regenza – vegnir mantegnidas er en il futur. Ultra da quai duai il chantun però er restar avert per novs partenadis e per novs instruments.

Contribuziun a la vieuta energetica federala

Sper la forza idraulica duai er vegnir augmentada la produziun d'electricitad cun las novas energias regenerablas e cun ovras idraulicas pitschnas (< 10 MW) per 600 GWh per onn. Ultra da quai survegnan mesiras d'effizienz en il sector da l'electricitad ina impurtanza pli gronda en il futur per ch'il consum d'electricitad possia vegnir stabilisà a lunga vista en il Grischun. Cun finamiras ambiziusas en il sector da l'effizienz e cun sias finamiras per engrondir la forza idraulica e per las ener-

gias regenerablas novas contribuescha il Grischun ina part essenziala a la vieuta energetica ch'è prevista da la confederaziun per l'onn 2050.

In provediment d'electricitad segir cun ina quantitat suffizienta d'electricitad en la qualitat necessaria resta in fatg central per ils basegns da la societad e da l'economia. En il sector da la rait da transport e da distribuziun duai il dumber dals gestiunaris vegnir reduci considerablmain.

Soluziuns fatgas sin mesira per il return dals implants

En connex cun il return dals implants a la concedanta duain vegnir tschertgadas – resguardond mintgamai las relaziuns concretas dal cas singul – soluziuns optimalas e fatgas sin mesira. En quest connex duain las vischnancas ed il chantun far valair en moda coordinada lur dretg d'exequir il dretg da return dals implants per augmentar la valorisaziun che deriva da la forza idraulica. Ils partenadis cun las societads d'ovras electricas èn sa cumprovads e duain perquai vegnir mantegnids. La finala duai il profil da scadenza da las ovras electricas che returan a las concedantas vegnir gulivà cun favurisar novs concessiunaments anticipads.

Il cussegl grond vegn a tractar il rapport davart la politica d'electricitad dal chantun Grischun en la sessiun d'avust 2012.